




Incipit tertia pars.



PIL, AS IT BIFALLETH TYMES MO,
Whan that this child had souked but a
throwe,
This markys in his herte longeth so
To tempte his wyf, hir sadness for to knowe,
That he ne myghte out of his herte throwe
This merveillous desir, his wyf tassaye,
Nedeless, God woot, he thoughte hire for
taffraye.

He hadde assayed hire ynogh bifore,
And foond hire evere good; what neded it
Hire for to tempte, and alwey more and more;
Though som men preise it for a subtil wit,
But as for me, I seye that yvele it sit
Tassaye a wyf whan that it is no nede,
And putten hire in angwyssh and in drede.

for which this markys wroghte in this manere;
He cam allone anyght, ther as she lay,
With stierne face and with ful trouble cheere,
And seyde thus, Grisilde, quod he, that day
That I yow took out of youre poure array,
And putte yow in estaat of heigh noblesse,
Ye have nat that forgeten, as I gesse.

I seye, Grisilde, this present dignitee,
In which that I have put yow, as I trowe,
Maketh yow nat forgetful for to be
That I yow took in poure estaat ful lowe,
for any wele ye moot yourselven knowe.
Taak heede of every word that I yow seye,
Ther is no wight that hereth it but we tweye.

Ye woot yourself wel, how that ye cam here
Into this hous, it is nat longe ago,
And though to me that ye be lief and deere,
Unto my gentils ye be nothyng so;
They seyn, to hem it is greet shame and wo

for to be subgetts and been in servage
To thee, that born art of a smal village.

And namely sith thy doghter was ybore,
Thise wordes han they spoken doutelees;
But I desire, as I have doon bifore,
To lyve my lyf with hem in reste and pees;
I may nat in this caas be recchelees.
I moot doon with thy doghter for the beste,
Nat as I wolde, but as my peple leste.

And yet, God woot, this is ful looth to me;
But nathelees withoute youre wityng
I wol nat doon, but this wol I, quod he,
That ye to me assente, as in this thyng.
Shewe now youre pacience in youre werkyng
That ye me highte and swore in youre village
That day that maketh was oure mariage.

WHAN she had herd al this, she noght
ameved,
Neither in word, or chiere, or countenance;
for, as it semed, she was nat agrevyd;
She seyde, Lord, al lyth in youre plesaunce,
My child and I with hertely obeisaunce,
Been youre al, and ye mowe save or spille
Your owene thyng; werketh after youre wille.

Ther may nothyng, God so my soule save!
Likn to yow that may displese me;
Ne I ne desire nothyng for to have,
Ne drede for to lese, save only ye;
This wyl is in myn herte, and ay shal be.
No lengthe of tyme, or deeth, may this deface,
Ne chaunge my corage to another place.

GLD was this markys of hire answeryng,
But yet he feyned as he were nat so;
At drery was his cheere and his lookyng,
Whan that he sholde out of the chambre go.
Soone after this, a furlong wey or two,
He prively hath toold al his entente
Unto a man, and to his wyf hym sente.

A maner sergeant was this privee man,
The which that feithful ofte he founden hadde
In thynges grete, and eek swich folk wel kan
Doon execucioun on thynges badde.
The lord knew wel that he hym loved and dradde;
And whan this sergeant wiste his lordes wille,
Into the chambre he stalked hym ful stille.

Madame, he seyde, ye moot foryeve it me,
Though I do thyng to which I am constreyned;
Ye been so wys that ful wel knowe ye
That lordes heestes mowe nat been yfeyned;
They mowe wel been biwailled and compleyned,
But men moot nede unto hire lust obeye,
And so wol I; ther is namoore to seye.

This child I am comanded for to take,
And spak namoore, but out the child he hente
Despitously, and gan a cheere make
As though he wolde han slayn it er he wente.
Grisildis moot al suffren and consente;

h 3

And as a lamb she sitteth meke and stille,
And leet this cruel sergeant doon his wille.

Suspicious was the diffame of this man,
Suspect his face, suspect his word also;
Suspect the tyme in which he this bigan.
Allas! hir doghter that she loved so,
She wende he wolde han slawen it right tho.
But nathelees she neither weeped ne syked,
Consentyng hire to that the markys lyked.

But atte laste spoken she bigan,
And mekely she to the sergeant preyde,
So as he was a worthy gentil man,
That she moste kisse hir child er that it deyde;
And in hir barm this litel child she leyde
With ful sad face, and gan the child to kisse,
And lulled it, and after gan it blisse.

And thus she seyde in hire benigne voys,
fare weel, my child; I shal thee nevere see!
But, sith I thee have marked with the croys,
Of thilke fader, blessed moot he be,
That for us deyde upon a croys of tree.
Thy soule, litel child, I hym bitake,
for this nyght shaltow dyen for my sake.

I trowe that to a norice in this cas
It had been hard this reuthe for to se;
Wel myghte a mooder thanne han cryd, Allas!
But nathelees, so sad stedefast was she,
That she endured al adversitee,
And to the sergeant mekely she sayde,
Have heer agayn youre litel yonge mayde.

Gooth now, quod she, & dooth my lordes heeste;
But o thyng wol I prey yow of youre grace,
That, but my lord forbad yow, atte leeste
Burieth this litel body in som place
That beestes ne no briddes it torace.
But he no word wol to that purpos seye,
But took the child and wente upon his weye.

THIS sergeant cam unto his lord ageyn,
And of Grisildis wordes and hire cheere
He tolde hym point for point, in short and
pleyn,
And hym presenteth with his doghter deere.
Somwhat this lord bath routhe in his manere;
But nathelees his purpos heeld he stille,
As lordes doon whan they wol han hir wille;

And bad his sergeant that he prively
Sholde this child ful softe wynde and wrappe
With alle circumstances tendrely,
And carie it in a cofre or in a lappe;
But, upon payne his heed of for to swappe,
That no man sholde knowe of his entente.
Ne whenne he cam, ne whider that he wente;

But at Boloigne to his suster deere,
That thilke tyme of Panik was countesse,
He sholde it take, and shewe hire this mateere,
Bisekyng hire to doon hire bisynesse
This child to fostre in alle gentillesse;

133

The Tale
of the
Clerk of
Oxenford